

論天文先之
七政而次則
五音六律分
野支于逐一
詳次其間灾
異之變妖祥
之應洞徹終
始矣

淮南鴻烈解卷三

天文訓

天墜未形。馮馮翼翼。洞洞瀾瀾。故曰大昭道始於虛
霏。虛霏生宇宙。宇宙生氣。氣有漢垠。清陽者。薄靡而
爲天。重濁者。凝滯而爲地。清妙之合專易。重濁之凝
竭難。故天先成而地後定。天地之襲精爲陰陽。陰陽
之專精爲四時。四時之散精爲萬物。積陽之熱氣生
火。火氣之精者爲日。積陰之寒氣爲水。水氣之精者
爲月。日月之淫爲精者爲星辰。天受日月星辰。地受



張賓王曰陰陽物類之感

水潦塵埃。昔者共工與顓頊爭為帝。怒而觸不周之山。天柱折。地維絕。天傾西北。故日月星辰移焉。地不滿東南。故水潦塵埃歸焉。天道曰圓。地道曰方。方者主幽。圓者主明。明者吐氣者也。是故火曰外景。幽者含氣者也。是故水曰內景。吐氣者施。含氣者化。是故陽施陰化。天之偏氣。怒者為風。地之含氣。和者為雨。陰陽相薄。感而為雷。激而為霆。亂而為霧。陽氣勝。則散而為雨露。陰氣勝。則凝而為霜雪。毛羽者。飛行之類也。故屬於陽。介鱗者。蟄伏之類也。故屬於陰。日者

陽燧等物與國之政其感天文若應景然萬物有以相連精稜有以相盪也

天吏四句一篇要領

陽之主也。是故春夏則羣獸除。日至而麋鹿解。月者陰之宗也。是以月虛而魚腦減。月死而羸蝓騰。火上尋。水下流。故鳥飛而高。魚動而下。物類相動。本標相應。故陽燧見日。則燃而為火。方諸見月。則津而為水。虎嘯而谷風至。龍舉而景雲屬。麒麟鬪而日月食。鯨魚死而彗星出。蠶珥絲而商弦絕。賁星墜而勃海決。人主之情。上通於天。故誅暴則多飄風。枉法令。則多蟲螟。殺不辜。則國赤地。令不收。則多淫雨。四時者。天之吏也。日月者。天之使也。星辰者。天之期也。虹蜺彗

星者。天之忌也。天有九野。九千九百九十九隅。去地五億萬里。五星八風。二十八宿。五官六府。紫宮太微。軒轅咸池。四守天阿。何謂九野。中央曰鈞天。其星角亢氐。東方曰蒼天。其星房心尾。東北曰變天。其星箕斗牽牛。北方曰玄天。其星須女虛危營室。西北方曰幽天。其星東壁奎婁。西方曰昊天。其星胃鼎畢。西南方曰朱天。其星觜雋參。東井南方曰炎天。其星輿鬼柳七星。東南方曰陽天。其星張翼軫。何謂五星。東方木也。其帝太皞。其佐句芒。執規而治春。其神爲歲星。

其獸蒼龍。其音角。其日甲乙。南方火也。其帝炎帝。其佐朱明。執衡而治夏。其神爲熒惑。其獸朱鳥。其音徵。其日丙丁。中央土也。其帝黃帝。其佐后土。執繩而制四方。其神爲鎮星。其獸黃龍。其音宮。其日戊巳。西方金也。其帝少昊。其佐蓐收。執矩而治秋。其神爲太白。其獸白虎。其音商。其日庚辛。北方水也。其帝顓頊。其佐玄冥。執權而治冬。其神爲辰星。其獸玄武。其音羽。其日壬癸。太陰在四仲。則歲星行三宿。太陰在四鉤。則歲星行二宿。二八十六。三四十二。故十二歲而行。

政失於此則
變見於彼若
響之應聲自
然之符也

二十八宿。日行十二分度之一。歲行三十度十六分
度之七。十二歲而周。熒惑常以十月入太微。受制而
出行列宿。司無道之國。爲亂爲賊。爲疾爲喪。爲饑爲
兵。出入無常。辯變其色。時見時匿。鎮星以甲寅元始
建斗。歲鎮行一宿。當居而弗居。其國亡土。未當居而
居之。其國益地。歲熟。日行二十八分度之一。歲行十
三度百一十二分度之五。一十八歲而周。太白元始。
以正月甲寅。與熒惑晨出東方。二百四十日而入。入
百二十日。而夕出西方。二百四十日而入。入三十五

八風分配八
音八節之氣
聖人所以遵
時序而出令
按土方而定
官

日。而復出東方。出以辰戌。入以丑未。當出而不出。未
當入而入。天下偃兵。當入而不入。當出而不出。天下
興兵。辰星正四時。常以二月春分。効奎婁。以五月夏
至。効東井輿鬼。以八月秋分。効角亢。以十一月冬至。
至効斗牽牛。出以辰戌。入以丑未。出二旬而入。晨候之
東方。夕候之西方。一時不出。其時不和。四時不出。天
下大饑。何謂八風。距日冬至四十五日。條風至。條風
至四十五日。明庶風至。明庶風至四十五日。清明風
至。清明風至四十五日。景風至。景風至四十五日。涼

風至。涼風至四十五日。閭闔風至。閭闔風至四十五日。不周風至。不周風至四十五日。廣莫風至。條風至。則出輕繫。去稽留。明庶風至。則正封疆。修田疇。清明風至。則出幣帛。使諸侯。景風至。則爵有位。賞有功。涼風至。則報地德。祀四郊。閭闔風至。則收縣垂。琴瑟不張。不周風至。則修宮室。繕邊城。廣莫風至。則閉關梁。決刑罰。何謂五官。東方爲田。南方爲司馬。西方爲理。北方爲司空。中央爲都。何謂六府。子午丑未寅申卯酉辰戌巳亥是也。太微者。太一之庭也。紫宮者。太一

之居也。軒轅者。帝妃之舍也。咸池者。水魚之囿也。天阿者。羣神之闕也。四宮者。所以爲司賞罰。太微者。主朱雀。紫宮執斗而左旋。日行一度。以周於天。日冬至峻狼之山。日移一度。月行百八十二度八分度之五。而夏至牛首之山。反覆三百六十五度四分度之一。而成一歲。天一元始。正月建寅。日月俱入營室五度。天一以始建七十六歲。日月復以正月入營室五度。無餘分。名曰一紀。凡二十紀。一千五百二十歲大終。日月星辰復始。甲寅元日行一度。而歲有奇四分度

蔡邕律曆記
候鍾律權土
炭冬至陽氣
應黃鍾通土
炭輕而衡仰
夏至陰氣應
蕤賓通土炭
重而衡低先
後進退五日
之中揔之陰
陽一盛一衰
毫不可爽也

之一。故四歲而積千四百六十一日而復合。故舍八十歲而復。故日子午卯酉爲二繩。丑寅辰巳未申戌亥爲四鉤。東北爲報德之維也。西南爲背陽之維。東南爲常羊之維。西北爲號通之維。日冬至。則斗北中繩。陰氣極。陽氣萌。故曰冬至爲德。日夏至。則斗南中繩。陽氣極。陰氣萌。故曰夏至爲刑。陰氣極。則北至北極。下至黃泉。故不可以鑿地穿井。萬物閉藏。蟄蟲首穴。故曰德在室。陽氣極。則南至南極。上至朱天。故不可以夷丘上屋。萬物蕃息。五穀兆長。故曰德在野。日

冬至。則水從之。日夏至。則火從之。故五月火正而水漏。十一月水正而陰勝。陽氣爲火。陰氣爲水。水勝故夏至溼。火勝故冬至燥。燥故炭輕。溼故炭重。日冬至。井水盛。盆水溢。羊脫毛。麋角解。鵲始巢。八尺之修。日中而景丈三尺。日夏至而流黃澤。石精出。蟬始鳴。半夏生。蟲蟲不食。駒犢鷲鳥不搏黃口。八尺之景。修徑尺五寸。景修則陰氣勝。景短則陽氣勝。陰氣勝則爲水。陽氣勝則爲旱。陰陽刑德有七舍。何謂七舍。室堂庭門巷術野。十二月德居室三十日。先日至十五日。

斗所指支干
十五日一變
因有二十四
氣而於律各
有所屬如環
之無端此陰

陽之神妙也

後日至十五日。而徙所居各三十日。德在室。則刑在野。德在堂。則刑在術。德在庭。則刑在巷。陰陽相德。則刑德合門。八月二月。陰陽氣均。日夜分平。故曰刑德合門。德南則生。刑南則殺。故曰二月會而萬物生。八月會而草木死。兩維之間。九十一度十六分。度之五而升。日行一度。十五日爲一節。以生二十四時之變。斗指子。則冬至。音比黃鍾。加十五日指癸。則小寒。音比應鍾。加十五日指丑。則大寒。音比無射。加十五日指報德之維。則越陰在地。故曰距日冬至四十六日。

而立春。陽氣凍解。音比南呂。加十五日指寅。則雨水。音比夷則。加十五日指甲。則雷驚蟄。音比林鍾。加十五日指卯。中繩。故曰春分。則雷行。音比蕤賓。加十五日指乙。則清明。風至。音比仲呂。加十五日指辰。則穀雨。音比姑洗。加十五日指常羊之維。則春分盡。故曰有四十六日而立夏。大風濟。音比夾鍾。加十五日指巳。則小滿。音比太簇。加十五日指丙。則芒種。音比太呂。加十五日指午。則陽氣極。故曰有四十六日而夏至。音比黃鍾。加十五日指丁。則小暑。音比太呂。加十

五日指未。則大暑。音比太簇。加十五日指背陽之維。則夏分盡。故曰有四十六日而立秋。涼風至。音比夾鍾。加十五日指甲。則處暑。音比姑洗。加十五日指庚。則白露降。音比仲呂。加十五日指酉。中繩。故曰秋分。雷戒螿蟲北鄉。音比蕤賓。加十五日指辛。則寒露。音比林鍾。加十五日指戌。則霜降。音比夷則。加十五日指號通之維。則秋分盡。故曰有四十六日而立冬。草木畢死。音比南呂。加十五日指亥。則小雪。音比無射。加十五日指壬。則大雪。音比應鍾。加十五日指子。故

曰陽生於子。陰生於午。陽生於子。故十一月日冬至。鵲始加巢。人氣鍾首。陰生於午。故五月爲小刑。薺麥亭歷枯。冬生草木必死。斗杓爲小歲。正月建寅。月從左行。十二辰咸池爲太歲。二月建卯。月從右行。四仲終而復始。太歲迎者辱。背者強。左者衰。右者昌。小歲東南則生。西北則殺。不可迎也。而可背也。不可左也。而可右也。其此之謂也。大時者。咸池也。小時者。月建也。天維建元。常以寅始起。右徙一歲而移。十二歲而大周天。終而復始。淮南元年。冬。太一在丙子。冬至甲

午。立春丙子。二陰一陽成氣二。二陽一陰成氣三。合氣而爲音。合陰而爲陽。合陽而爲律。故曰五音六律。音自倍而爲日。律自倍而爲辰。故日十而辰。十二月日行十三度七十六分度之二十六。二十九日。九百四十分日之四。百九十九而爲月。而以十二月爲歲。歲有餘十日九百四十分日之八。百二十七。故十九歲而七閏。日冬至子午。夏至卯酉。冬至加三日。則夏至之日也。歲遷六日。終而復始。壬午冬至。甲子受制。木用事。火煙青。七十二日。丙子受制。火用事。火煙赤。

七十二日。戊子受制。土用事。火煙黃。七十二日。庚子受制。金用事。火煙白。七十二日。壬子受制。水用事。火煙黑。七十二日而歲終。庚子受制。歲遷六日。以數推之。七十歲而復至甲子。甲子受制。則行柔惠。挺羣禁。開闔扇。通障塞。毋伐木。丙子受制。則舉賢良。賞有功。立封侯。出貨財。戊子受制。則養老鰥寡。行糴鬻。施恩澤。庚子受制。則繕牆垣。修城廓。審羣禁。飾兵甲。儆百官。誅不法。壬子受制。則閉門閭。大搜客。斷刑罰。殺當罪。息關梁。禁外徙。甲子氣燥濁。丙子氣燥陽。戊子氣

如江都相董
生推言陰陽
四時相繼父
生之子養之
母成之子藏
之故春生仁
夏長德秋成
義冬藏禮此
四時之序聖
人之所則也

溼濁。庚子氣燥寒。壬子氣清寒。丙子干甲子。蟄蟲早出。故雷早行。戊子干甲子。胎夭卵。鳥蟲多傷。庚子干甲子。有兵。壬子干甲子。春有霜。戊子干丙子。霆。庚子干丙子。夷。壬子干丙子。雹。甲子干丙子。地動。庚子干戊子。五穀有殃。壬子干戊子。夏寒。雨霜。甲子干戊子。介蟲不爲。丙子干戊子。大旱。菰封燻。壬子干庚子。大剛。魚不爲。甲子干庚子。草木再死再生。丙子干庚子。草木復榮。戊子干庚子。歲或存或亡。甲子干壬子。冬乃不藏。丙子干壬子。星墜。戊子干壬子。蟄蟲冬出。

其鄉。庚子干壬子。冬雷其鄉。季春三月。豐隆乃出。以將其雨。至秋三月。地氣不藏。乃收其殺。百蟲蟄伏。靜居閉戶。青女乃出。以降霜雪。行十二時之氣。以至於仲春二月之夕。乃收其藏而閉其寒。女夷鼓歌。以司天和。以長百穀禽鳥草木。孟夏之月。以熟穀禾。雉鳩長鳴。爲帝侯歲。是故天不發其陰。則萬物不生。地不發其陽。則萬物不成。天圓地方。道在中央。日爲德。月爲刑。月歸而萬物死。日至而萬物生。遠山則山氣藏。遠水則水蟲蟄。遠木則木葉槁。日五日不見。失其位。

日所至而萬物生之處凡十五所其間支干十二律亦以此為推驗

也。聖人不與也。日出於暘谷。浴於咸池。拂於扶桑。是謂晨明。登於扶桑。爰始將行。是謂朏明。至於曲阿。是謂旦明。至於曾泉。是謂蚤食。至於桑野。是謂晏食。至於衡陽。是謂隅中。至於昆吾。是謂正中。至於鳥次。是謂小還。至於悲谷。是謂鋪時。至於女紀。是謂大還。至於淵虞。是謂高春。至於連石。是謂下春。至於悲泉。爰止其女。爰息其馬。是謂縣車。至於虞淵。是謂黃昏。至於蒙谷。是謂定昏。日入於虞淵之汜。曙於蒙谷之浦。行九州七舍。有五億萬七千三百九里。禹以為朝晝

昏夜。夏日至。則陰乘陽。是以萬物就而死。冬日至。則陽乘陰。是以萬物仰而生。晝者陽之分。夜者陰之分。是以陽氣勝。則日修而夜短。陰氣勝。則日短而夜修。帝張四維。運之以斗。月徙一辰。復反其所。正月指寅。十二月指丑。一歲而匝。終而復始。指寅則萬物蟄。律受太族。太族者。族而未出也。指卯。卯則茂茂然。律受夾鍾。夾鍾者。種始莢也。指辰。辰則振之也。律受姑洗。姑洗者。陳去而新來也。指巳。巳則生巳定也。律受仲呂。仲呂者。中充大也。指午。午者。忤也。律受蕤賓。蕤賓

斗之所指下
應十二律天
所以通五行
八正之氣所
以成熟萬物
也

者安而服也。指未。未昧也。律受林鍾。林鍾者。引而止也。指申。申者呻之也。律受夷則。夷則者。易其則也。德以去矣。指酉。酉者飽也。律受南呂。南呂者任包大也。指戌。戌者滅也。律受無射。無射。入無厭也。指亥。亥者闕也。律受應鍾。應鍾者。應其鍾也。指子。子者茲也。律受黃鍾。黃鍾者。鍾已黃也。指丑。丑者紐也。律受大呂。大呂者。旅旅而去也。其加卯酉。則陰陽分。日夜平矣。故曰規生矩殺。衡長權藏。繩居中央。爲四時根。道曰規始於一。一而不生。故分而爲陰陽。陰陽合和而萬

物生。故曰一生二。二生三。三生萬物。天地三月而爲一時。故祭祀三飯以爲禮。喪紀三踊以爲節。兵重三罕以爲制。以三參物。三三如九。故黃鍾之律九寸。而宮音調。因而九之。九九八十一。故黃鍾之數立焉。黃者。土德之色。鍾者。氣之所種也。日冬至。德氣爲土。土色黃。故曰黃鍾。律之數六。分爲雌雄。故曰十二鍾。以副十二月。十二各以三成。故置一而十一。三之。爲積分十七萬七千一百四十七。黃鍾大數立焉。凡十二律。黃鍾爲宮。太簇爲商。姑洗爲角。林鍾爲徵。南呂爲

一陽生於子
黃鍾位子故
黃鍾為聲氣
之元而五音
十二律生焉

羽。物以三成音以五立。三與五如八。故卵生者八竅。律之初生也。寫鳳之音。故音以八生。黃鍾為宮。宮者音之君也。故黃鍾位子。其數八十一。主十一月。下生林鍾。林鍾之數五十四。主六月。上生太簇。太簇之數七十二。主正月。下生南呂。南呂之數四十八。主八月。上生姑洗。姑洗之數六十四。主三月。下生應鍾。應鍾之數四十二。主十月。上生蕤賓。蕤賓之數五十七。主五月上生大呂。大呂之數七十六。主十二月。下生夷則。夷則之數五十一。主七月。上生夾鍾。夾鍾之數六

十八。主二月。下生無射。無射之數四十五。主九月。上生仲呂。仲呂之數六十。主四月。極不生。徵生宮。宮生商。商生羽。羽生角。角生姑洗。姑洗生應鍾。比於正音故為和。應鍾生蕤賓。不比正音。故為繆。日冬至。音比林鍾。浸以濁。日夏至。音比黃鍾。浸以清。以十二律應二十四時之變。甲子。仲呂之徵也。丙子。夾鍾之羽也。戊子。黃鍾之宮也。庚子。無射之商也。壬子。夷則之角也。古之為度量輕重。生乎天道。黃鍾之律修九寸。物以三生。三九二十七。故幅廣二尺七寸。音以八相生。

此度量權衡之始

陽生陰為下
生陰生陽為
上生律書云
以下生者倍
其實三其法
以上生者四
其實三其法

故人修八尺尋自倍。故八尺而為尋。有形則有聲。音之數五。以五乘八。五八四十。故四丈而為匹。匹者。中人之度也。一匹而為制。秋分蓂定。蓂定而禾熟。律之數十二。故十二粟而當一粟。十二粟而當一丈。律以當辰。音以當日。日之數十。故十寸而為尺。十尺而為丈。其以為量十二粟而當一分。十二分而當一銖。十銖而當半兩。衡有左右。因倍之。故二十四銖為一兩。天有四時以成一歲。因而四之。四四十六。故十六兩而為一斤。三月而為一時。三十日為一月。故三十

斤為一鈞。四時而為一歲。故四鈞為一石。其以為音也。一律而生五音。十二律而為六十音。因而六之。六六三十六。故三百六十音。以當一歲之日。故律歷之數。天地之道也。下生者倍以三。除之。上生者四以三。除之。

太陰元始。建於甲寅。一終而建甲戌。二終而建甲午。三終而復得甲寅之元。歲徙一辰。立春之後。得其辰而遷其所順。前三後五。百事可舉。太陰所建。蟄蟲首穴而處。鵲巢鄉而為戶。太陰在寅。朱鳥在卯。勾陳在

子。玄武在戌。白虎在酉。蒼龍在辰。寅爲建。卯爲除。辰爲滿。巳爲平。主生。午爲定。未爲執。主陷。申爲破。主衡。酉爲危。主杓。戌爲成。主小德。亥爲收。主大德。子爲開。主太歲。丑爲閉。主太陰。太陰在寅。歲名曰攝提格。其雄爲歲星。舍斗牽牛。以十一月與之。晨出東方。東井與鬼爲對。太陰在卯。歲名曰單闕。歲星舍須女虛危。以十二月與之。晨出東方。柳七星張爲對。太陰在辰。歲名曰執除。歲星舍營室東壁。以正月與之。晨出東方。翼軫爲對。太陰在巳。歲名曰大荒落。歲星舍奎婁。

以二月與之。晨出東方。角亢爲對。太陰在午。歲名曰敦牂。歲星舍胃昴畢。以三月與之。晨出東方。氏房心爲對。太陰在未。歲名曰協洽。歲星舍觜雋參。以四月與之。晨出東方。尾箕爲對。太陰在申。歲名曰涇灘。歲星舍東井與鬼。以五月與之。晨出東方。斗牽牛爲對。太陰在酉。歲名曰作鄂。歲星舍柳七星張。以六月與之。晨出東方。須女虛危爲對。太陰在戌。歲名曰闍茂。歲星舍翼軫。以七月與之。晨出東方。營室東壁爲對。太陰在亥。歲名曰大淵獻。歲星舍角亢。以八月與之。

二十八宿之所經度本有定在故太陰之行與之爲對

五行生死之
所屬金木水
火土之窮極
盡矣

晨出東方。奎婁爲對。太陰在子。歲名困敦。歲星舍氏房心。以九月與之。晨出東方。胃昴畢爲對。太陰在丑。歲名曰赤奮若。歲星舍尾箕。以十月與之。晨出東方。背嵩參爲對。太陰在甲子。刑德合東方宮。常徙所不勝。合四歲而離。離十六歲而復合。所以離者。刑不得入中宮。而徙於木。太陰所居曰德。辰爲刑德。綱曰日倍因。柔曰徙所不勝。刑水辰之木。木辰之水。金火立其處。凡徙諸神。朱鳥在太陰前一。鉤陳在後三。玄武在前五。白虎在後六。虛星乘鉤陳。而天地襲矣。凡日

甲剛乙柔。丙剛丁柔。以至於癸。木生於亥。壯於卯。死於未。三辰皆木也。火生於寅。壯於午。死於戌。三辰皆火也。土生於午。壯於戌。死於寅。三辰皆土也。金生於巳。壯於酉。死於丑。三辰皆金也。水生於申。壯於子。死於辰。三辰皆水也。故五勝生一壯。五終九。五九四十五。故神四十五日而一徙。以三應五。故八徙而歲終。凡用太陰。左前刑。右背德。擊鉤陳之衝辰。以戰必勝。以攻必剋。欲知天道。以日爲主。六月當心。左周而行。分而爲十二月。與日相當。天地重襲。後必無殃。星正

經星所屬分
寸特操其梗

槩耳至班椽
所載則其疆
域風土治亂
靡不具見

月建營室。二月建奎婁。三月建胃。四月建畢。五月建
東井。六月建張。七月建翼。八月建亢。九月建房。十月
建尾。十一月建牽牛。十二月建虛。

星分度。角十二。亢九。氏十五。房五。心五。尾十八。箕十
一。四分一。斗二十六。牽牛八。須女十二。虛十。危十七。
營室十六。東壁九。奎十六。婁十二。胃十四。昴十一。畢
十六。觜雋二。參九。東井三十。輿鬼四。柳十五。星七。張
翼各十八。軫十七。凡二十八宿也。

星部地名。角亢鄭。氏房心宋。尾箕燕。斗牽牛越。須女

吳。虛危齊。營室東壁衛。奎婁魯。胃昴畢魏。觜雋參趙。
東井輿鬼秦。柳七星張周。翼軫楚。歲星之所居。五穀
豐昌。其對為衝。歲乃有殃。當居而不居。越而之他處。
主死國亡。太陰治春。則欲行柔惠。溫涼。太陰治夏。則
欲布施宣明。太陰治秋。則欲修備繕兵。太陰治冬。則
欲猛毅剛彊。三歲而改節。六歲而易常。故三歲而一
饑。六歲而一衰。十二歲一康。甲齊。乙東夷。丙楚。丁南
夷。戊魏。巳韓。庚秦。辛西夷。壬衛。癸越。子周。丑翟。寅楚。
卯鄭。辰晉。巳衛。午秦。未宋。申齊。酉魯。戌趙。亥燕。甲乙

寅卯木也。丙丁巳午火也。戊己四季土也。庚辛申酉金也。壬癸亥子水也。水生木。木生火。火生土。土生金。金生水。子生母曰義。母生子曰保。子母相得曰專。母勝子曰制。子勝母曰困。以勝擊殺。勝而無報。以專從事而有功。以義行理。名立而不墮。以保畜養。萬物蕃昌。以困舉事。破滅死亡。北斗之神有雌雄。十一月始建於子。月從一辰。雄左行。雌右行。五月合午。謀刑。十一月合子。謀德。太陰所居。辰爲厭日。厭日不可以舉百事。堪輿徐行。雄以音知雌。故爲竒辰。數從甲子始。

即歲星所臨
可知國之吉凶

子母相求。所合之處爲合。十日十二辰。周六十日凡八合。合於歲前則死亡。合於歲後則無殃。甲戌燕也。乙酉齊也。丙午越也。丁巳楚也。庚申秦也。辛卯戎也。壬子趙也。癸亥胡也。戊戌巳亥韓也。巳酉巳卯魏也。戊午戊子。八合天下也。太陰小歲星日辰。五神皆合。其日有雲氣風雨。國君當之。天神之貴者。莫貴於青龍。或曰天一。或曰太陰。太陰所居。不可背而可鄉。北斗所擊。不可與敵。天地以設分而爲陰陽。陽生於陰。陰生於陽。陰陽相錯。四維乃通。或死或生。萬物乃成。

蚊行喙息。莫貴於人。孔竅肢體。皆通於天。天有九重。人亦有九竅。天有四時。以制十二月。人亦有四肢。以使十二節。天有十二月。以制三百六十日。人亦有十二肢。以使三百六十節。故舉事而不順天者。逆其生者也。以日冬至數來歲正月朔日。五十日者。民食足。不滿五十日。日減一斗。有餘日。日益一升。有其歲司也。

此圖藏本式

丁未水老東井鬼
 午壯金生柳星
 丙巳金生耀

甲生水參
 庚酉金壯驛
 辛戌火老壯參

亥水生壁
 子水壯須女
 丑金老牽牛

辰水老房心
 卯水壯尾箕
 震火生老

升。午在戊曰著雊。

協洽之歲。歲有小兵。蠶登。稻昌。菽麥不為。民食三升

未。在巳曰屠維。

浚灘之歲。歲和。小雨行。蠶登。菽麥昌。民飲三升。申在

庚曰上章。

作鄂之歲。歲有大兵。民疾。蠶不登。菽麥不為。禾蟲。民

食五升。酉在辛曰重光。

掩茂之歲。歲小饑。有兵。蠶不登。麥不為。菽昌。民食七

升。戌在壬曰玄默。

大淵獻之歲。歲有大兵。大饑。蠶開。菽麥不為。禾蟲。民

食三升。

困敦之歲。歲大霧起。大水出。蠶稻麥昌。民食三斗。子

在癸曰昭陽。

赤奮若之歲。歲有小兵。旱水。蠶不出。稻疾。菽不為。麥

昌。民食一升。

正朝夕。先樹一表東方。操一表却。去前表十步。以參

望日。始出北廉。日直入。又樹一表於東方。因西方之

表。以參望日。方入北廉。則定東方兩表之中。與西方

用表測景之法。寢失其初。此亦淮南諸儒勸襲陳語耳。當參之唐貞觀中曆家

之表。則東西之正也。日東至。日出東南維。入西南維。至春秋分。日出東中。入西中。夏至出東北維。入西北維。至則正南。欲知東西南北廣袤之數者。立四表。以爲方一里。峽。先春分。若秋分。十餘日。從峽北表參望。日始出。及旦。以候相應。相應。則此與日直也。輒以南表參望之。以入前表數爲法。除舉廣。除立表表。以知從此東西之數也。假使視日出入。前表中一寸。是寸得一里也。一里積萬八千寸。得從此東萬八千里。視日方入。入前表半寸。則半寸得一里。半寸而除一里。

積寸得三萬六千里。除則從此西里數也。并之東西里數也。則極徑也。未春分而直。已秋分而不直。此處南也。未秋分而直。已春分而不直。此處北也。分至而直。此處南北中也。從中處。欲知中南也。未秋分而不直。此處南北中也。從中處。欲知南北極遠近。從西南表參望日。日夏至始出。與北表參。則是東與東北表等。正東萬八千里。則從中北亦萬八千里也。倍之南北之里數也。其不從中之數也。以出入前表之數益損之。表入一寸。寸減日近一里。表出一寸。寸益遠一

里。欲知天之高。樹表高一丈正。南北相去千里。同日度其陰。北表二尺。南表尺九寸。是南千里陰短寸。南二萬里則無景。是直日下也。陰二尺而得高一丈者。南一而高五也。則置從此南至。日下里數。因而五之。爲十萬里。則天高也。若使景與表等。則高與遠等也。

淮南鴻烈解卷四

墜形訓

墜形之所載。六合之間。四極之內。昭之以日月。經之以星辰。紀之以四時。要之以太歲。天地之間。九州八極。土有九山。山有九塞。澤有九藪。風有八等。水有六品。何謂九州。東南神州曰農土。正南次州曰沃土。西南戎州曰滔土。正西兗州曰并土。正中冀州曰中土。西北台州曰肥土。正北濟州曰成土。東北薄州曰隱土。正東陽州曰申土。何謂九山。會稽。泰山。王屋。首山。

是訓采獲舊聞考述詩書而其文則職方氏可尋源而按者其中錯綜天地點綴宇宙如畫史矣

總計四海道
里覽者覺有
意 忝米世界之

太華。岐山。太行。羊腸。孟門。何謂九塞。曰太汾。澠。阨。荆
阨。方城。殽。阪。井。陘。令。疵。句。注。居庸。何謂九藪。曰越之
具區。楚之雲夢。秦之陽紆。晉之大陸。鄭之圃田。宋之
孟諸。齊之海隅。趙之鉅鹿。燕之昭余。何謂八風。東北
曰炎風。東方曰條風。東南曰景風。南方曰巨風。西南
曰涼風。西方曰飈風。西北曰麗風。北方曰寒風。何謂
六水。曰河水。赤水。遼水。黑水。江水。淮水。闔四海之內。
東西二萬八千里。南北二萬六千里。水道八千里。通
谷。其名川六百。陸徑三千里。禹乃使太章步自東極。

至於西極。二億三萬三千五百里。七十五步。使豎亥
步自北極。至於南極。二億三萬三千五百里。七十五
步。凡鴻水淵藪。自三百仞以上。二億三萬三千五百
五十里。有九淵。禹乃以息土填洪水以爲名山。掘崑
崙虛以下地。中有增城。九重。其高萬一千里。百一十
四步。二尺六寸。上有木禾。其修五尋。珠樹。玉樹。璇樹。
不死樹。在其西。沙棠琅玕在其東。絳樹在其南。碧樹
瑤樹在其北。旁有四百四十門。門間四里。里間九純。
純丈五尺。旁有九井。玉橫維其西北之隅。北門開以

此又添出黃
水丹水

內不周之風。傾宮旋室。縣圃涼風。樊桐在崑崙閭闔之中。是其疏圃。疏圃之池。浸之黃水。黃水三周復其原。是謂丹水。飲之不死。河水出崑崙東北。貫渤海。入禹所導積石山。赤水出其東南。瓠。西南注南海。丹澤之東。赤水之東。弱水出自窮石。至於合黎。餘波入於流沙。絕流沙。南至南海。洋水出其西北。瓠。入於南海。羽民之南。凡四水者。帝之神泉。以和百藥。以潤萬物。崑崙之丘。或上倍之。是謂涼風之山。登之而不死。或上倍之。是謂懸圃。登之乃靈。能使風雨。或上倍之。

九州之外有
八殞八紘
極即騶衍所
稱中國於天
下八十分居
其一分之說

乃維上天。登之乃神。是謂太帝之居。扶木在陽州。日之所曠。建木在都廣。衆帝所自上下。日中無景。呼而無嚮。蓋天地之中也。若木在建木西。末有十日。其華照下地。九州之大。純方千里。九州之外。乃有八殞。亦方千里。自東北方。曰大澤。曰無通。東方。曰大渚。曰少海。東南方。曰旻區。曰元澤。南方。曰大夢。曰浩澤。西南方。曰渚資。曰丹澤。西方。曰九區。曰泉澤。西北方。曰大夏。曰海澤。北方。曰大冥。曰寒澤。凡八殞。八澤之雲。是雨。九州八殞之外。而有八紘。亦方千里。自東北方。曰

諸方物產之
美皆入絃八
殞八極雲雨
所生

東西為緯四
向此地形之

和丘。曰荒土。東方。曰棘林。曰桑野。東南方。曰大窮。曰
衆女。南方。曰都廣。曰反戶。西南方。曰焦僥。曰炎土。西
方。曰金丘。曰沃野。西北方。曰一目。曰沙所。北方。曰積
冰。曰委羽。凡八絃之氣。是出寒暑。以合八正。必以風
雨。八絃之外。乃有八極。自東北方。曰方土之山。曰蒼
門。東方。曰東極之山。曰開明之門。東南方。曰波母之
山。曰陽門。南方。曰南極之山。曰暑門。西南方。曰編駒
之山。曰白門。西方。曰西極之山。曰閭闔之門。西北方。
曰不周之山。曰幽都之門。北方。曰北極之山。曰寒門。

凡八極之雲。是雨天下。八門之風。是節寒暑。八絃八
殞八澤之雲。以雨九州。而和中土。東方之美者。有醫
母閭之珣玕琪焉。東南方之美者。有會稽之竹箭焉。
南方之美者。有梁山之犀象焉。西南方之美者。有華
山之金石焉。西方之美者。有霍山之珠玉焉。西北方
之美者。有崑崙之球琳琅玕焉。北方之美者。有幽都
之筋角焉。東北方之美者。有斥山之文皮焉。中央之
美者。有岱嶽以生五穀。桑麻魚鹽出焉。凡地形東西
為緯。南北為經。山為積德。川為積刑。高者為生。下者

為死。丘陵為牡。谿谷為牝。水圓折者有珠。方折者有玉。清水有黃金。龍淵有玉英。土地各以其類生。是故山氣多男。澤氣多女。障氣多暗。風氣多聾。林氣多癢。木氣多偃。岸下氣多腫。石氣多力。險阻氣多癯。暑氣多天。寒氣多壽。谷氣多痺。丘氣多狂。衍氣多仁。陵氣多貪。輕土多利。重土多遲。清水音小。濁水音大。湍水人輕。遲水人重。中土多聖人。皆象其氣。皆應其類。故南方有不死之草。北方有不釋之冰。東方有君子之國。西方有形殘之尸。寢居直夢。人死為鬼。磁石上飛。

前山氣多男
一段單說人
類此則合天
地之歧行頓
息者悉可概
見

雲母來水。土龍致雨。燕鴈代飛。蛤蟹珠龜。與月盛衰。是故堅土人剛。弱土人肥。壩土人大。沙土人細。息土人美。耗土人醜。食水者善游能寒。食土者無心而慧。食木者多力而彞。食草者善走而愚。食葉者有絲而蛾。食肉者勇敢而捍。食氣者神明而壽。食穀者知慧而夭。不食者不死而神。凡人民禽獸萬物貞蟲各有以生。或竒或偶。或飛或走。莫知其情。唯知通道者能原本之。天一。地二。人三。三三而九。九九八十一。一主日。日數十。日主人。人故十月而生。八九七十二。二主

奇偶之數應
前昭之以日
月四句

偶。偶以成奇。奇主辰。辰主月。月主馬。馬故十二月而
生。七九六十三。三主斗。斗主犬。犬故三月而生。六九
五十四。四主時。時主彘。彘故四月而生。五九四十五。
五主音。音主後。後故五月而生。四九三十六。六主律。
律主麋。麋鹿故六月而生。三九二十七。七主星。星
主虎。虎故七月而生。二九十八。八主風。風主蟲。蟲故
八月而化。鳥魚皆生於陰。陰屬於陽。故鳥魚皆卵生。
魚游於水。鳥飛於雲。故立冬燕雀入海化爲蛤。萬物
之生而各異類。蠶食而不飲。蟬飲而不食。蜉蝣不飲

不食。介鱗者。夏食而冬蟄。齧吞者。八竅而卵生。嚼咽
者。九竅而胎生。四足者。無羽翼。戴角者。無上齒。無角
者。膏而無前。有角者。指而無後。晝生者。類父。夜生者
似母。至陰生牝。至陽生牡。夫熊羆蟄藏。飛鳥時移。是
故白水宜玉。黑水宜砥。青水宜碧。赤水宜丹。黃水宜
金。清水宜龜。汾水濛濁而宜麻。濟水通和而宜麥。河
水中濁而宜菽。雒水輕利而宜禾。渭水多力而宜黍。
漢水重安而宜竹。江水肥仁而宜稻。平土之人慧而
宜五穀。

摸擬五方民
生物產可綴
禹貢

東方川谷之所注。日月之所出。其人兠形。小頭。隆鼻。大口。鳶肩。企行。竅通於目。筋氣屬焉。蒼色主肝。長大。早知而不壽。其地宜麥。多虎豹。

南方陽氣之所積。暑濕居之。其人修形。兠上。大口。決眦。竅通於耳。血脉屬焉。赤色主心。早壯而夭。其地宜稻。多兕象。

西方高土。川谷出焉。日月入焉。其人面末。僂。修頸。印行。竅通於鼻。皮革屬焉。白色主肺。勇敢不仁。其地宜黍。多旄犀。

北方幽晦不明。天之所閉也。寒水之所積也。蟄蟲之所伏也。其人翁形。短頸。大肩。下尻。竅通於陰。骨幹屬焉。黑色主腎。其人蠢愚。禽獸而壽。其地宜菽。多大馬。中央四達。風氣之所通。雨露之所會也。其人大面。短頤。美鬚。惡肥。竅通於口。膚肉屬焉。黃色主胃。慧聖而好治。其地宜禾。多牛羊及六畜。木勝土。土勝水。水勝火。火勝金。金勝木。故禾春生秋死。菽夏生冬死。麥秋生夏死。薺冬生中夏死。木壯水老。火生金囚。土死。火壯木老。土生水囚。金死。土壯火老。金生水囚。水死。金

五行之生各
歸於本可見
物極則反非
獨人為蓋亦
天道

壯土老。水生火。囚木死。水壯金老。木生土。囚火死。音
有五聲。宮其主也。色有五章。黃其主也。味有五變。甘
其主也。位有五材。土其主也。是故鍊土生木。鍊木生
火。鍊火生雲。鍊雲生水。鍊水反土。鍊甘生酸。鍊酸生
辛。鍊辛生苦。鍊苦生鹹。鍊鹹反甘。變宮生徵。變徵生
商。變商生羽。變羽生角。變角生宮。是故以水和土。以
土和火。以火化金。以金治木。木復反土。五行相治。所
以成器用。

凡海外三十六國。自西北至西南方。有修股民。天民。

三十六國之
民其形大異
五方海外風
氣之舛如此

肅慎民。白民。沃民。女子民。丈夫民。奇稽股民。一臂民。
三身民。自西南至東南方。結胷民。羽民。謹頭國民。裸
國民。三苗民。交股民。不死民。穿胷民。反舌民。豕喙民。
鑿齒民。三頭民。修臂民。自東南至東北方。有大人國。
君子國。黑齒民。玄股民。毛民。勞民。自東北至西北方。
有跂踵民。句嬰民。深目民。無腸民。柔利民。一目民。無
繼民。雒棠武人在西北。瓠魚在其南。有神二人。連
臂為帝。候夜在其西南方。三珠樹在其東北方。有玉
樹在赤水之上。崑崙華丘在其東南方。爰有遺玉。青

馬視肉。楊桃甘楮甘華。百果所生。和丘在其東北。瓠
三桑無枝在其西。夸父耽耳在其北方。夸父棄其策。
是爲鄧林。昆吾丘在南方。軒轅丘在西方。巫咸在其
北方。立登保之山。暘谷搏桑在東方。有娥在不周之
北。長女簡翟。少女建疵。西王母在流沙之瀕。樂民拏
閭。在崑崙弱水之洲。三危在樂民西。宵明燭光在河
洲。所照方千里。龍門在河淵。湍池在崑崙。玄燿不周
申池在海隅。孟諸在沛。少室太室在冀州。燭龍在鴈
門北。蔽於委羽之山。不見日。其神人面龍身而無足。

后稷瓏在建木西。其人死復蘇。其半魚在其間。流黃
沃民在其北。方三百里。狗國在其東。雷澤有神。龍身
人頭。鼓其腹而熙。江出岷山。東流。絕漢入海。左還北
流。至於開母之北。右還東流。至於東極。河出積石。睢
出荆山。淮出桐栢山。睢出羽山。清漳出楊戾。濁漳出
發包。濟出王屋。時泗沂出臺台術。洛出獵山。汶出弗
其。流合於濟。漢出嶓冢。涇出薄落之山。渭出鳥鼠同
穴。伊出上魏。雒出熊耳。浚出華竅。維出覆舟。汾出燕
京。在出瀆熊。淄出目飴。丹水出高禘。股出嶠山。鎬出

容羽毛鱗介
五類俱由無
情而之有情
相代謝而盛

鮮于。涼出茅廬石梁。汝出猛山。淇出大號。晉出龍山。
結給合出封羊。遼出砥石。釜出景。岐出石橋。呼池出
魯平。泥塗淵出構山。維濕北流出於燕。

諸稽攝提。條風之所生也。通視。明庶風之所生也。赤
奮若。清明風之所生也。共工。景風之所生也。諸比。涼
風之所生也。臯稽。閭闔風之所生也。隅強。不周風之
所生也。窮奇。廣莫風之所生也。突生海人。海人生若
菌。若菌生聖人。聖人生庶人。凡容者生於庶人。羽嘉
生飛龍。飛龍生鳳凰。鳳凰生鸞鳥。鸞鳥生庶鳥。凡羽

者生於庶鳥。毛犢生應龍。應龍生建馬。建馬生麒麟。
麒麟生庶獸。凡毛者生於庶獸。介鱗生蛟龍。蛟龍生
鯤鯁。鯤鯁生建邪。建邪生庶魚。凡鱗者生於庶魚。介
潭生先龍。先龍生玄龜。玄龜生靈龜。靈龜生庶龜。凡
介者生於庶龜。煖濕生容。煖濕生於毛風。毛風生於
濕玄。濕玄生羽風。羽風生煖介。煖介生鱗薄。鱗薄生
煖介。五類雜種與乎外。肖形而蕃。曰馮生陽闕。陽闕
生喬如。喬如生幹木。幹木生庶木。凡根拔木者生於
庶木。根拔生程若。程若生玄玉。玄玉生醴泉。醴泉生

五土之氣上
御乎天而及
陰陽相薄為
雷電則復下
而合於海此
五行之精化
生既極而歸
藏其宅也

皇草。皇草生庶草。凡根茨草者生於庶草。海閭生屈
龍。屈龍生容華。容華生藁。藁生萍藻。萍藻生浮草。凡
浮生不根茨者生於萍藻。正土之氣也。御乎埃天。埃
天五百歲生缺。缺五百歲生黃埃。黃埃五百歲生黃
湏。黃湏五百歲生黃金。黃金千歲生黃龍。入藏生黃
泉。黃泉之埃。上為黃雲。陰陽相薄為雷。激揚為電。上
者就下。流水就通。而合於黃海。偏土之氣。御乎清天。
清天八百歲生青曾。青曾八百歲生青湏。青湏八百
歲生青金。青金八百歲生青龍。青龍入藏生清泉。清

泉之埃。上為青雲。陰陽相薄為雲雷。激揚為電。上者
就下。流水就通。而合於青海。壯土之氣。御於赤天。赤
天七百歲生赤丹。赤丹七百歲生赤湏。赤湏七百歲
生赤金。赤金千歲生赤龍。赤龍入藏生赤泉。赤泉之
埃。上為赤雲。陰陽相薄為雷。激揚為電。上者就下。流
水就通。而合於赤海。弱土之氣。御於白天。白天九百
歲生白礬。白礬九百歲生白湏。白湏九百歲生白金。
白金千歲生白龍。白龍入藏生白泉。白泉之埃。上為
白雲。陰陽相薄為雷。激揚為電。上者就下。流水就通。

而合於白海。牝土之氣。御於玄天。玄天六百歲生玄砥。玄砥六百歲生玄瀕。玄瀕六百歲生玄金。玄金千歲生玄龍。玄龍入藏生玄泉。玄泉之埃。上爲玄雲。陰陽相薄爲雷。激揚爲電。上者就下。流水就通。而合於玄海。

賓王曰叙地形井井終歸知道

淮南鴻烈解卷五

時則訓

孟春之月。招搖指寅。昏參中。旦尾中。其位東方。其日甲乙。盛德在木。其蟲鱗。其音角。律中太簇。其數八。其味酸。其臭羶。其祀戶。祭先脾。東風解凍。蟄蟲始振。蘇魚上負冰。獺祭魚。候鴈北。天子衣青衣。乘蒼龍。服蒼玉。建青旗。食麥與羊。服八風水。饗其燧火。東宮御女。青色衣。青采。鼓琴瑟。其兵矛。其畜羊。朝於青陽左个。以出春令。布德施惠。行慶賞。省徭賦。立春之日。天子

大較從呂覽中撮其要竄其煩至後五位六合六度乃其所創撰而綴之者

天子四時所尚之色俱從五行其出令亦如之

順水德而尚
仁恩
孟春行夏令
此已火之氣
所泄行秋令
此申金之氣
所傷行冬令
此亥水之氣
所淫

親率三公九卿大夫。以迎歲於東郊。修除祠位。幣禱鬼神。犧牲用牡。禁伐木。毋覆巢。殺胎夭。毋麇毋卵。毋聚衆。置城郭。掩骼薶骹。孟春行夏令。則風雨不時。草木早落。國乃有恐。行秋令。則其民大疫。飄風暴雨。總至。黎莠蓬蒿並興。行冬令。則水潦爲敗。雨霜大雹。首稼不入。正月官司空。其樹楊。仲春之月。招搖指卯。昏弧中。旦建星中。其位東方。其日甲乙。其蟲鱗。其音角。律中夾鍾。其數八。其味酸。其臭羶。其祠戶。祭先脾。始雨水。桃李始華。蒼庚鳴。鷹化爲鳩。天子衣青衣。乘蒼

仲春行秋令
此酉金之氣

龍服蒼玉。建青旗。食麥與羊。服八風水。爨萁燧火。東宮御女。青色衣。青采。鼓琴瑟。其兵矛。其畜羊。朝於青陽大廟。命有司省囹圄。去桎梏。毋笞掠。止獄訟。養幼小。存孤獨。以通句萌。擇元日。令民社。是月也。日夜分。雷始發聲。蟄蟲咸動。蘇先雷三日。振鐸以令於兆民。曰。雷且發聲。有不戒其容止者。生子不備。必有凶災。令官市同度量。鈞衡石。角斗稱。端權槩。毋竭川澤。毋漉陂池。毋焚山林。毋作大事。以防農功。祭不用犧牲。用圭璧。更皮幣。仲春行秋令。則其國大水。寒氣總至。

所傷行冬令
子水之氣所
淫行夏令午
火之氣所泄

寇戎來征。行冬令。則陽氣不勝。麥乃不熟。民多相殘。行夏令。則其國大旱。燠氣早來。蟲螟爲害。二月官倉。其樹杏。季春之月。招搖指辰。昏七星中。旦牽牛中。其位東方。其日甲乙。其蟲麟。其音角。律中姑洗。其數八。其味酸。其臭羶。其祀戶。祭先脾。桐始華。田鼠化爲鴛。虹始見。萍始生。天子衣青衣。乘蒼龍。服蒼玉。建青旗。食麥與羊。服八風水。爨其燧火。東宮御女。青色衣。青采。鼓琴瑟。其兵矛。其畜羊。朝於青陽右个。舟牧覆舟。伍覆五反。乃言具於天子。天子焉始乘舟。薦鮪於寢。

廟。乃爲麥祈實。是月也。生氣方盛。陽氣發泄。句者畢出。萌者盡達。不可以內。天子命有司。發困倉。助貧窮。振乏絕。開府庫。出幣帛。使諸侯。聘名士。禮賢者。命司空。時雨將降。下水上騰。循行國邑。周視原野。修利隄防。導通溝瀆。達路除道。從國始至境。止田獵。畢弋且罝。罝羅罟。餒毒之藥。毋出九門。乃禁野虞。毋伐桑柘。鳴鳩奮其羽。戴鷩降於桑。具撲曲筥筐。后妃齋戒。東鄉親桑。省婦使勸蠶事。命五庫。令百工審金鐵皮革。筋角箭榦。脂膠丹漆。無有不良。擇下旬吉日。大合樂。致

季春行冬令
丑土之氣所
應行夏令未
土之氣所應
行秋令戌土
之氣所應

歡欣。乃合牒牛騰馬。游牝於牧。令國儼。九門磔攘。以
畢春氣。行是月令。甘雨至三旬。季春行冬令。則寒氣
時發。草木皆肅。國有大恐。行夏令。則民多疾疫。時雨
不降。山陵不登。行秋令。則天多沈陰。淫雨早降。兵革
並起。三月官鄉。其樹李。孟夏之月。招搖指巳。昏翼中。
旦婺女中。其位南方。其日丙丁。盛德在火。其蟲羽。其
音徵。律中仲呂。其數七。其味苦。其臭焦。其祀竈。祭先
肺。螻蝮鳴。丘蟪出。王瓜生。苦菜秀。天子衣赤衣。乘赤
騮。服赤玉。建赤旗。食菽與雞。服八風水。爨柘燧火。南

順火德而尚
長養

孟夏行秋令
申金之氣所
泄行冬令亥
水之氣所傷

宮御女。赤色衣。赤采。吹竽笙。其兵戟。其畜雞。朝於明
堂。左个。以出夏令。立夏之日。天子親率三公九卿大
夫。以迎歲於南郊。還乃賞賜。封諸侯。修禮樂。饗左右。
命太尉贊俊傑。選賢良。舉孝悌。行爵出祿。佐天長養。
繼修增高。無有隳壞。毋興土功。毋伐大樹。令野虞行
田原。勸農事。驅獸畜。勿令害殺。天子以彘嘗麥。先薦
寢廟。聚畜百藥。靡草死。麥秋至。決小罪。斷薄刑。孟夏
行秋令。則苦雨數來。五穀不滋。四隣入保。行冬令。則
草木早枯。後乃大水。敗壞城郭。行春令。則螽蝗爲敗。

行春令寅木
之氣所淫

暴風來格。秀草不實。四月官田。其樹桃。仲夏之月。招搖指午。昏亢中。旦危中。其位南方。其日丙丁。其蟲羽。其音徵。律中蕤賓。其數七。其味苦。其臭焦。其祀竈。祭先肺。小暑至。螳螂生。鴟始鳴。反舌無聲。天子衣赤衣。乘赤騮。服赤玉。載赤旗。食菽與雞。服八風水。爨柘燧火。南宮御女。赤色衣。赤采。吹竽笙。其兵戟。其畜雞。朝於明堂太廟。命樂師修鞀。鞀琴瑟管簫。調竽箎。飾鍾磬。執干戚戈羽。命有司爲民祈祀山川百源。大雩。帝用盛樂。天子以雛嘗黍。羞以含桃。先薦寢廟。禁民無

仲夏行冬令
子水之氣所
傷行春令卯
木之氣所淫
行秋令酉金
之氣所泄

刈藍以染。毋燒灰。毋暴布。門閭無閉。關市無索。挺重囚。益其食。存鰥寡。振死事。游牝別其羣。執騰駒。班馬政。日長至。陰陽爭。死生分。君子齋戒。慎身無躁。節聲色。薄滋味。百官靜事。無徑以定。晏陰之所成。鹿角解。蟬始鳴。半夏生。木董榮。禁民無發火。可以居高明。遠眺望。登丘陵。處臺榭。仲夏行冬令。則雹霰傷穀。道路不通。暴兵至。行春令。則五穀不熟。百膳時起。其國乃饑。行秋令。則草木零落。果實蚤成。民殃於疫。五月官相其樹榆。季夏之月。招搖指未。昏心中。旦奎中。其位

四時中惟季夏與孟夏仲夏不相叶蓋戊己寄旺於中央而此月為陽消陰長之會故天子所尚之色亦從而變順土德而尚畜藏

季夏行春令辰土之氣所應行秋令戌土之氣所應行冬令丑土之氣所應

中央其日戊己。盛德在土。其蟲羸。其音宮。律中百鐘。其數五。其味甘。其臭香。其祀中霤。祭先心。涼風始至。蟋蟀居奧。鷹乃學習。腐草化為蚋。天子衣苑黃。乘黃騶。服黃玉。建黃旗。食稷與牛。服八風水。爨柘燧火。中宮御女。黃色衣。黃采。其兵劔。其畜牛。朝於中宮。乃命漁人伐蛟。取鼉。登龜。取鼃。令滂人入材葦。命四監大夫。令百縣之秩芻。以養犧牲。以供皇天上帝。名山大川。四方之神。宗廟社稷。為民祈福。行惠令。弔死問疾。存視長老。行稔鬻。厚席蓐。以送萬物歸也。命婦官染

采。黼黻文章。青黃白黑。莫不質良。以給宗廟之服。必宣以明。是月也。樹木方盛。勿敢斬伐。不可以合諸侯。起土功。動衆興兵。必有天殃。土潤溽暑。大雨時行。利以殺草。糞田疇。以肥土。墾季夏行春令。則穀實解落。多風欬。民乃遷徙。行秋令。則丘隰水潦。稼穡不熟。乃多女災。行冬令。則風寒不時。鷹隼蚤擊。四鄙入保。六月官少內。其樹梓。孟秋之月。招搖指申。昏斗中。旦畢中。其位西方。其日庚辛。盛德在金。其蟲毛。其音商。律中夷則。其數九。其味辛。其臭腥。其祀門。祭先肝。涼風

順金德而尚
斷制

至。白露降。寒蟬鳴。鷹乃祭鳥。用始行戮。天子衣白衣。乘白駱。服白玉。建白旗。食麻與犬。服八風水。爨柘燧。火。西宮御女。白色衣。白采。撞白鐘。其兵戈。其畜狗。朝於總章左个。以出秋令。求不孝不悌。戮暴傲悍。而罰之。以助損氣。立秋之日。天子親率三公九卿大夫。以迎秋於西郊。還乃賞軍。率武人於朝。命將率。選卒厲兵。簡練桀俊。專任有功。以征不義。詰誅暴慢。順彼四方。命有司修法制。繕囹圄。禁姦塞邪。審決獄。平詞訟。天地始肅。不可以羸。是月農始升穀。天子嘗新。先薦

孟秋行冬令
亥水之氣所
泄行春令寅
木之氣所損
行夏令巳火
之氣所傷

寢廟。命百官始收斂。完隄防。謹障塞。以備水潦。修城郭。繕宮室。毋以封侯。立太官。行重幣。出大使。行是月令。涼風至。三旬。孟秋行冬令。則陰氣大勝。介蟲敗穀。戎兵乃來。行春令。則其國乃旱。陽氣復還。五穀無實。行夏令。則冬多火災。寒暑不節。民多瘧疾。七月官庫。其樹棟。仲秋之月。招搖指西。昏牽牛中。旦觜雋中。其位西方。其日庚辛。其蟲毛。其音商。律中南呂。其數九。其味辛。其臭腥。其祀門。祭先肝。涼風至。候鴈來。玄鳥歸。羣鳥翔。天子衣白衣。乘白駱。服白玉。建白旗。食麻

仲秋行春令
卯木之氣所
損行夏令午
火之氣所傷
行冬令子水
之氣所泄

與犬。服八風水。爨柘燧火。西宮御女。白色衣。白采。撞
白鐘。其兵戈。其畜犬。朝於總章太廟。命有司申嚴百
刑。斬殺必當。無或枉撓。決獄不當。反受其殃。是月也。
養長老。授几杖。行稔鬻飲食。乃命宰祝行犧牲。案芻
豢。視肥臞。全瘁。察物色。課比類。量小大。視少長。莫不
中度。天子乃儺。以御秋氣。以犬麻先薦寢廟。是月可
以築城郭。建都邑。穿竇窖。修困倉。乃命有司趣民牧。
歛畜采。多積聚。勸種宿麥。若或失時。行罪無疑。是月
也。雷乃始收。蟄蟲培戶。殺氣浸盛。陽氣日衰。水始涸。

日夜分。一度量。平權衡。正鈞石。角斗稱。理關市。來商
旅。入貨財。以便民事。四方來集。遠方皆至。財物不匱。
上無乏用。百事乃遂。仲秋行春令。則秋雨不降。草木
生榮。國有大恐。行夏令。則其國乃旱。蟄蟲不藏。五穀
皆復生。行冬令。則風災數起。收雷先行。草木早死。八
月官尉。其樹柘。季秋之月。招搖指戌。昏虛中。旦柳中。
其位西方。其日庚辛。其蟲毛。其音商。律中無射。其數
九。其味辛。其臭腥。其祀門。祭先肝。候鴈來賓。雀入大
水爲蛤。菊有黃華。豺乃祭獸戮禽。天子衣白衣。乘白

駱服白玉。建白旗。食麻與犬。服八風水。爨柘燧火。西宮御女。白色衣。白采。撞白鐘。其兵戈。其畜犬。朝於總章右个。命有司申嚴號令。百官貴賤。無不務入。以會天地之藏。無有宣出。乃命冢宰。農事備收。舉五穀之要。藏帝籍之收於神倉。是月也。霜始降。百工休。乃命有司曰。寒氣總至。民力不堪。其皆入室。上下入學。習吹。大饗帝。嘗犧牲。合諸侯制百縣。爲來歲受朔日。與諸侯所稅於民輕重之法。貢歲之數。以遠近土地所宜爲度。乃教於田獵。以習五戎。命太僕及七駟。咸駕

季秋行夏令
未土之氣所
應行冬令丑
土之氣所應
行春令辰土
之氣所應

戴荏。授車以級。皆正設於屏外。司徒搢朴。北嚮以贊之。天子乃厲服廣飾。執弓操矢以獵。命主祠祭禽四方。是月草木黃落。乃伐薪爲炭。蟄蟲咸俛。乃趨獄刑。毋留有罪。收祿秩之不當。供養之不宜者。通路除道。從境始。至國而後已。是月天子乃以犬嘗麻。先薦寢廟。季秋行夏令。則其國大水。冬藏殃敗。民多餓室。行冬令。則國多盜賊。邊境不寧。土地分裂。行春令。則煥風來至。民氣解惰。師旅並興。九月官候。其樹槐。孟冬之月。招搖指亥。昏危中。旦七星中。其位北方。其日壬

癸。盛德在水。其蟲介。其音羽。律中應鍾。其數六。其味鹹。其臭腐。其祀井。祭先賢。水始冰。地始凍。雉入大水爲蜃。虹藏不見。天子衣黑衣。乘玄驪。服玄玉。建玄旗。食黍與菽。服八風水。饗松燧火。北宮御女。黑色衣。黑采擊磬石。其兵鍛。其畜彘。朝於玄堂左个。以出冬令。命有司修羣禁。禁外徙。閉閭。大按客。斷罰刑。殺當罪。阿上亂法者誅。立冬之日。天子親率三公九卿大夫。以迎歲於北郊。還乃賞死事。存孤寡。是月命太祝禱祀神位。占龜策。審封兆。以察吉凶。於是天子始裘。命

順水德而尚
固守

百官謹蓋藏。命司徒行積聚。修城郭。警門閭。修棧閉。慎管籥。固封璽。修邊境。完要塞。絕蹊徑。飾喪紀。審棺槨。衣衾之薄厚。營丘壠之小大。高庫。使貴賤卑尊。各有等級。是月也。工師劬功。陳祭器。案度呈堅致爲上。工事苦慢。作爲淫巧。必行其罪。是月也。大飲蒸。天子祈來年於天宗。大禱祭於公社。畢饗先祖。勞農失以休息之命。將率講武。律射御。角力勁。乃命水虞漁師。收水泉池澤之賦。毋或侵牟。孟冬。行春令。則凍閉不密。地氣發泄。民多流亡。行夏令。則多暴風。方冬不寒。

孟冬行春令
寅木之氣所
泄行夏令已
火之氣所損

蟄蟲復出。行秋令。則雪霜不時。小兵時起。土地侵削。十月官司馬。其樹檀。仲冬之月。招搖指子。昏壁中。旦軫中。其位北方。其日壬癸。其蟲介。其音羽。律中黃鍾。其數六。其味鹹。其臭腐。其祀井。祭先賢。冰益壯。地始坼。鳩鳴不鳴。虎始交。天子衣黑衣。乘鐵驪。服玄玉。建玄旗。食黍與彘。服八風水。爨松燧火。北宮御女。黑色衣。黑采。擊磬石。其兵鍛。其畜彘。朝於玄堂太廟。命有司曰。土事無作。無發室居。及起大衆。是謂發天地之藏。諸蟄則死。民必疾疫。有隨以喪。急捕盜賊。誅淫泆。

詐僞之人。命曰暘月。命奄尹。申官令。審門閭。謹房室。必重閉。省婦事。乃命大酋。秫稻必齊。麴蘖必時。湛熇必潔。水泉必香。陶器必良。火齊必得。無有差忒。天子乃命有司祀四海大川名澤。是月也。農有不收藏積聚。牛馬畜獸有放失者。取之不詰。山林藪澤。有能取。疏食田獵禽獸者。野虞教導之。其有相侵奪。罪之不赦。是月也。日短至。陰陽爭。君子齋戒。處必掩。身欲靜。去聲色。禁嗜欲。寧身體。安形性。是月也。荔挺出。芸始生。丘蟪結。麋角解。水泉動。則伐樹木。取竹箭。罷官之。

仲冬行夏令
午火之氣所
克行秋令酉
金之氣所泄
行春令卯木
之氣所泄

無事。器之無用者。涂闕庭門閭。築囹圄。所以助天地之閉。仲冬行夏令。則其國乃旱。氛霧冥冥。雷乃發聲。行秋令。則其時雨水。瓜瓠不成。國有大兵。行春令。則蟲螟爲敗。水泉咸竭。民多疾癘。十一月官都尉。其樹棗。季冬之月。招搖指丑。昏婁中。旦氏中。其位北方。其日壬癸。其蟲介。其音羽。律中大呂。其數六。其味鹹。其臭腐。其祀井。祭先賢。鴈北鄉。鵲如巢。雉雊雞呼卵。天子衣黑衣。乘鐵驪。服玄玉。建玄旗。食麥與彘。服八風水。爨松燧火。北宮御女。黑色衣。黑采。擊磬石。其兵鍔。

其畜彘。朝於玄堂。右个。命有司大儺。旁磔。出土牛。命漁師始漁。天子親往射漁。先薦寢廟。令民出五種。令農計耦耕事。修耒耜。具田器。命樂師大合吹而罷。乃命四監收秩薪。以供寢廟。及百祀之薪燎。是月也。日窮於次。月窮於紀。星周於天。歲將更始。令靜農民。無有所使。天子乃與公卿大夫飾國典。論時令。以待嗣歲之宜。乃命太史次諸侯之列。賦之犧牲。以供皇天上帝社稷之芻享。乃命同姓女國供寢廟之芻豢。卿士大夫。至於庶民。供山林名川之祀。季冬行秋令。則

季冬行秋令
戌土之氣所

應行春令辰
土之氣所應
行夏令未土
之氣所應

五位之極其
氣與中土異
故更隨地制
令

白露早降。介蟲爲禱。四鄙入保。行春令。則胎夭傷。國
多痼疾。命之曰逆。行夏令。則水潦敗國。時雪不降。冰
凍消釋。十二月官獄。其樹櫟。五位東方之極。自竭石
山過朝鮮。貫大人之國。東至日出之次扶耨木之地。
青土樹木之野。太皞句芒之所司者。萬二千里。其令
曰。挺羣禁。開閉闔。通窮室。達障塞。行優游。棄怨惡。解
役罪。免刑。開關梁。宣出財。和外怨。撫四方。行柔惠。止
剛強。南方之極。自北戶孫之外。貫顛頊之國。南至委
火炎風之野。赤帝祝融之所司者。萬二千里。其令曰。

爵有德。賞有功。惠賢良。救饑渴。舉力農。賑貧窮。惠孤
寡。憂罷疾。出大祿。行大賞。起毀宗。立無後。封建侯。立
賢輔。中央之極。自崑崙東絕兩恒山。日月之所道。江
漢之所出。衆民之野。五穀之所宜。龍門河濟。相貫以
息壤堙洪水之州。東至於碣石。黃帝后土之所司者。
萬二千里。其令曰。平而不阿。明而不苛。包裹覆露。無
不囊懷。溥汜無私。正靜以和。行稔鬻。養老衰。弔死問
疾。以送萬物之歸。西方之極。自崑崙絕流沙沈羽。西
至三危之國。石城金室。飲氣之民。不死之野。少皞蓐

收之所司者。萬二千里。其令曰。審用法。誅必辜。備盜賊。禁姦邪。飾羣牧。謹著聚。修城郭。補決竇。塞蹊徑。遏溝瀆。止流水。壅谿谷。守門閭。陳兵甲。選百官。誅不法。北方之極。自九澤窮。夏晦之極。北至今正之谷。有凍寒積冰。雪雹霜霰。漂潤羣水之野。顛頊玄冥之所司者。萬二千里。其令曰。申羣禁。固閉藏。修障塞。繕關梁。禁外徙。斷罰刑。殺當罪。閉關閭。大搜客。止交游。禁夜樂。蚤閉晏開。以塞姦人。已得。執之。必固。天節已幾。刑殺無赦。雖有盛尊之親。斷以法度。毋行水。毋發藏。毋

釋罪。六合。孟春與孟秋爲合。仲春與仲秋爲合。季春與季秋爲合。孟夏與孟冬爲合。仲夏與仲冬爲合。季夏與季冬爲合。孟春始羸。孟秋始縮。仲春始出。仲秋始內。季春大出。季秋大內。孟夏始緩。孟冬始急。仲夏至修。仲冬至短。季夏德畢。季冬刑畢。故正月失政。七月涼風不至。二月失政。八月雷不藏。三月失政。九月不下霜。四月失政。十月不凍。五月失政。十一月蟄蟲冬出其鄉。六月失政。十二月草木不脫。七月失政。正月大寒不解。八月失政。二月雷不發。九月失政。三月

六度語甚道
古

春風不濟。十月失政。四月草木不實。十一月失政。五月下雹霜。十二月失政。六月五穀疾狂。春行夏令泄。行秋令水。行冬令肅。夏行春令風。行秋令蕪。行冬令格。秋行夏令華。行春令榮。行冬令耗。冬行春令泄。行夏令旱。行秋令霧。製度陰陽大制有六度。天爲繩。地爲準。春爲規。夏爲衡。秋爲矩。冬爲權。繩者。所以繩萬物也。準者。所以準萬物也。規者。所以負萬物也。衡者。所以平萬物也。矩者。所以方萬物也。權者。所以權萬物也。繩之爲度也。直而不爭。修而不窮。久而不弊。遠

而不忘。與天合德。與神合明。所欲則得。所惡則亡。自古及今。不可移匡。厥德孔密。廣大以容。是故上帝以爲物宗。準之爲度也。平而不險。巧而不阿。廣大以容。寬裕以和。柔而不剛。銳而不挫。流而不滯。易而不穢。發通而有紀。周密而不泄。準平而不失。萬物皆平。民無險謀。怨惡不生。是故上帝以爲物平。規之爲度也。轉而不復。負而不坑。優而不縱。廣大以寬。感動有理。發通有紀。優優簡簡。百怨不起。規度不失。生氣乃理。衡之爲度也。緩而不後。平而不怨。施而不德。弔而不

責。常平民祿。以繼不足。教教陽陽。唯德是行。養長化育。萬物蕃昌。以成五穀。以實封疆。其政不失。天地乃明。矩之爲度也。肅而不悖。剛而不憤。取而無怨。內而無害。威厲而不懾。令行而不廢。殺伐旣得。仇敵乃克。矩正不失。百誅乃服。權之爲度也。急而不羸。殺而不割。充滿以實。周密而不泄。敗物而弗取。罪殺而不赦。誠信以必堅。慤以固。冀除苛慝。不可以曲。故冬正將行。必弱以強。必柔以剛。權正而不失。萬物乃藏。明堂之制。靜而法準。動而法繩。春治以規。秋治以矩。冬治以權。夏治以衡。是故燥溼寒暑以節至。甘雨膏露以時降。

張賓王曰時則訓掇之呂覽然寢失故武後段六制雜出韵語詞旨適贗

覽冥語撫拾
異典聯綴而
古今異類之
神怪者如觀
牛渚之燃犀
足當遊神玄
覽之一助

張賓王曰警
悚

淮南鴻烈解卷六

覽冥訓

昔者師曠奏白雪之音。而神物爲之下降。風雨暴至。平公瘡病。晉國赤地。庶女叫天。雷電下擊。景公臺隕。支體傷折。海水大出。夫瞽師庶女。位賤尚慕。權輕飛羽。然而專精厲意。委務積神。上通九天。激厲至精。由此觀之。上天之誅也。雖在壙虛幽間。遼遠隱匿。重襲石室。界障險阻。其無所逃之。亦明矣。武王伐紂。渡於孟津。陽侯之波。逆流而擊。疾風晦冥。人馬不相見。於

是武王左操黃鉞。右秉白旄。瞋目而搗之。曰。余任天下。誰敢害吾意者。於是風濟而波罷。魯陽公與韓構難。戰酣日暮。援戈而搗之。日爲之退三舍。夫全性保真。不虧其身。遭急迫難。精通於天。若乃未始出其宗者。何爲而不成。夫死生同域。不可脅陵。勇武一人。爲三軍雄。彼直求名耳。而能自要者。尚猶若此。又況夫宮天地。懷萬物。而友造化。含至和。直偶於人形。觀九鑛一。知之所不知。而心未嘗死者乎。昔雍門子以哭見於孟嘗君。已而陳辭通意。撫心發聲。孟嘗君爲之

弋射微技而
以知道術稱
此亦莊生之
寓言

張賓王曰上
下感通之理
博洽精微

增欷歔。流涕狼戾不可止。精神形於內。而外諭哀於人心。此不傳之道。使俗人不得其君形者。而效其容。必爲人笑。故蒲且子之連鳥於百仞之上。而詹何之驚魚於大淵之中。此皆得清淨之道。太浩之和也。夫物類之相應。玄妙深微。知不能論。辯不能解。故東風至。而酒湛溢。蠶叫絲。而商絃絕。或感之也。晝隨灰。而月運闕。鯨魚死。而彗星出。或動之也。故聖人在位。懷道而不言。澤及萬民。君臣垂心。則背譎見於天。神氣相應。徵矣。故山雲草莽。水雲魚鱗。旱雲煙火。溱雲

東風至至此
多言物類之
相應玄妙深
微

波水。各象其形類。所以感之。夫陽燧取火於日。方諸
取露於月。天地之間。巧歷不能舉其數。手微忽。况不
能覽其光。然以掌握之中。引類於太極之上。而水火
可立致者。陰陽同氣相動也。此傳說之所以騎辰尾
也。故至陰颺颺。至陽赫赫。兩者交接成和。而萬物生
焉。衆雄而無雌。又何化之所能造乎。所謂不言之辯。
不道之道也。故召遠者使無爲焉。親近者使無事焉。
惟夜行者爲能有之。故却走馬以糞。而車軌不接於
遠方之外。是謂坐馳陸沈。晝冥宵明。以冬鑠膠。以夏

造冰。夫道者無私就也。無私去也。能者有餘。拙者不
足。順之者利。逆之者凶。譬如隋侯之珠。和氏之璧。得
之者富。失之者貧。得失之度深微。窈冥難以知論。不
可以辯說也。何以知其然。今夫地黃主屬骨。而甘草
主生肉之藥也。以其屬骨。責其生肉。以其生肉。論其
屬骨。是猶王孫綽之欲倍偏枯之藥。而欲以生殊死
之人。亦可謂失論矣。若夫以火能焦木也。因使銷金
則道行矣。若以磁石之能連鐵也。而求其引瓦。則難
矣。物固不可以輕重論也。夫燧之取火於日。磁石之

物不可以輕
重論應得失

之度深微窈冥

利害禍福不可求而得亦應深微窈冥

淮南文往往即喻上轉喻若纍層臺而此篇尤勝

引鐵蟹之敗漆。葵之鄉日。雖有明智弗能然也。故耳目之察。不足以分物理。心意之論。不足以定是非。故以智爲治者。難以持國。唯通於太和而持自然之應者。爲能有之。故嶢山崩而薄落之水涸。區冶生而淳鈞之劍成。紂爲無道。左強在側。太公並世。故武王之功立。由是觀之。利害之路。禍福之門。不可求而得也。夫道之與德。若韋之與革。遠之則邇。近之則遠。不得其道。若觀儵魚。故聖若鏡。不將不迎。應而不藏。故萬化而無傷。其得之乃失之。其失之非乃得之也。今夫

調弦者。叩宮宮應。彈角角動。此同聲相和者也。夫有改調一弦。其於五音無所比。鼓之而二十五弦皆應。此未始異於聲。而音之君已形也。故通於太和者。惛若純醉而甘卧。以游其中而不知其所由也。純温以淪鈍悶以終。若未始出其宗。是謂大通。今夫赤螭青虬之游冀州也。天清地定。毒獸不作。飛鳥不駭。入榛薄。食薦梅。嗜味含甘。步不出頃畝之區。而蛇鱓輕之。以爲不能與之爭於江海之中。若乃至於玄雲之素朝。陰陽交爭。降扶風。雜凍雨。扶搖而登之。威動天地。

小動之迹乃
王良造父之

御大節之所
由即鉗且大
丙之御小動
惟任智巧大
節則通於太
和

聲震海內。蛇鱗著泥百仞之中。熊羆匍匐。丘山暫巖。虎豹襲穴而不敢咆。猿狖顛蹶而失木枝。又况直蛇鱗之類乎。鳳凰之翔至德也。雷霆不作。風雨不興。川谷不澹。草木不搖。而燕雀伎之以為不能與之爭於宇宙之間。還至其曾。逝萬仞之上。翱翔四海。過崑崙之。疏圃飲砥柱之湍。瀨澶回蒙汜之渚。尚佯冀州之際。徑躡都廣。入日抑節。羽翼弱水。暮宿風穴。當此之時。鴻鵠鶴鷺。莫不憚驚。伏竄注喙。江裔又况直燕雀之類乎。此明於小動之迹。而不知大節之所由者也。

昔者王良造父之御也。上車攝轡。馬為整齊。而歛諧。投足調均。勞逸若一。心怡氣和。體便輕畢。安勞樂進。馳騫若滅。左右若鞭。周旋若環。世皆以為巧。然未見其貴者也。若夫鉗且大丙之御。除轡御。去鞭棄策。車莫動而自舉。馬莫使而自走也。日行月動。星耀而玄。運電奔而鬼騰。進退屈伸。不見朕垠。故不招指。不咄叱。過歸鴈於碣石。軼鷄鷄於姑餘。騁若飛。騫若絕。縱矢躡風。追焱歸忽。朝發博桑。日入落棠。此假弗用。而能以成其用者也。非慮思之察。手爪之巧也。嗜欲形

極力形容博
士家採入時

藝中則富麗
極矣

力牧山稽之
未及處戲氏
者以其猶任
智故而未通
於道德也

於胸中。而精神踰於六馬。此以弗御御之者也。昔者黃帝治天下。而力牧太山稽輔之。以治日月之行律。治陰陽之氣。節四時之度。正律歷之數。別男女。異雌雄。明上下。等貴賤。使強不掩弱。衆不暴寡。人民保命而不夭。歲時熟而不凶。百官正而無私。上下調而無尤。法令明而不闇。輔佐公而不阿。田者不侵畔。漁者不爭隈。道不拾遺。市不豫賈。城郭不關。邑無盜賊。鄙旅之人。相讓以財。狗彘吐菽粟於路。而無忿爭之心。於是日月精明。星辰不失其行。風雨時節。五穀登熟。

虎狼不妄噬。鷙鳥不妄搏。鳳凰翔於庭。麒麟游於郊。青龍進駕。飛黃伏皂。諸北僭耳之國。莫不獻其貢職。然猶未及處戲氏之道也。往古之時。四極廢。九州裂。天不兼覆。地不周載。火熾炎而不滅。水浩洋而不息。猛獸食顓民。鷙鳥攫老弱。於是女媧鍊五色石以補蒼天。斷鼈足以立四極。殺黑龍以濟冀州。積蘆灰以止淫水。蒼天補。四極正。淫水涸。冀州平。狡蟲死。顓民生。背方州。抱圓天。和春陽。夏殺秋約。冬枕方寢。繩陰陽之所壅沈不通者。竅理之逆氣戾物。傷民厚積者。

詳虛戲氏之道

絕止之當此之時。臥倨倨興眇眇。一自以為馬。一自以為牛。其行躡躡。其視瞑瞑。侗然皆得其和。莫知所由生。浮游不知所求。魍魎不知所往。當此之時。禽獸蝮蛇無不匿其爪牙。藏其螫毒。無有攫噬之心。考其功烈。上際九天。下契黃墟。名聲被後世。光暉重萬物。乘雷車。服駕應龍。驂青虬。援絕瑞。席蘿圖。黃雲絡。前白螭。後奔蛇。浮游消搖。道鬼神。登九天。朝帝於靈門。宓穆休於太祖之下。然而不彰其功。不揚其聲。隱真人之道。以從天地之固然。何則。道德上通而智。故消

言夏桀不及虛戲之世

滅也。逮至夏桀之時。王闇晦而不明。道瀾漫而不修。棄捐五帝之恩刑。推蹶三王之法籍。是以至德滅而不揚。帝道揜而不興。舉事戾蒼天。發號逆四時。春秋縮其和。天地除其德。仁君處位而不安。大夫隱道而不言。羣臣準上意而懷當。疏骨肉而自容。邪人參耦。比周而陰謀。居君臣父子之間。而競載驕主而像其意。亂人以成其事。是故君臣乖而不親。骨肉疏而不附。植社槁而墜裂。容臺振而掩覆。犬羣嗥而入淵。豕銜蓐而席澳。美人挈首墨面而不容。曼聲吞炭。內閉

夏桀之世有亂徵無亂形至七國則日尋甲卒扶傷載道以其時各制法任力之極而不可止也

而不歌。喪不盡其哀。獵不聽其樂。西姥折勝。黃神嘯吟。飛鳥鍛翼。走獸廢脚。山無峻幹。澤無注水。狐狸首穴。馬牛放失。田無立禾。路無莎蒨。金積折廉。壁襲無理。磬龜無腹。著策日施。晚世之時。七國異族。諸侯制法。各殊習俗。縱橫間之。舉兵而相角。攻城濫殺。覆高危安。掘墳墓。揚人骸。大衝車。高重京。除戰道。便死路。犯嚴敵。殘不義。百往一反。名聲苟盛也。是故質壯輕足者爲甲卒。千里之外。家老羸弱。悽愴於內。廝徒馬圍。輶車奉饗。道馬遼遠。霜雪亟集。短褐不完。人羸車

弊泥塗至膝。相攜於道。奮首於路。身枕格而死。所謂兼國有地者。伏尸數十萬。破車以千百數。傷弓弩矛戟矢石之創者。扶舉於路。故世至於枕人頭。食人肉。茹人肝。飲人血。甘之芻豢。故自三代以後者。天下未嘗得安其情性。而樂其習俗。保其修命。天而不夭於人虐也。所以然者。何也。諸侯力征。天下合而爲一家。逮至當今之時。天子在上位。持以道德。輔以仁義。近者獻其智。遠者懷其德。拱揖指麾。而四海賓服。春秋冬夏。皆獻其貢職。天下混而爲一。子孫相代。此五帝

鉗且大丙處
戲女媧總結
前意其旨只
在無為故下
遂言申韓商
鞅之治不得
其本

之所以迎天德也。夫聖人者不能生時。時至而弗失也。輔佐有能。黜讒佞之端。息巧辯之說。除刻削之法。去煩苛之事。屏流言之迹。塞朋黨之門。消知能。修太常。隳肢體。絀聰明。大通混冥。解意釋神。漠然若無覓。鬼使萬物各復歸其根。則是所修伏羲氏之迹。而反五帝之道也。夫鉗且大丙。不施轡銜。而以善御聞於天下。伏戲女媧。不設法度。而以至德遺於後世。何則。至虛無純一。而不嚶喋苛事也。周書曰。掩雉不得。更順其風。今若夫申韓商鞅之爲治也。捽拔其根。蕪棄

申韓商鞅不
知治之本拜

其本。而不窮究其所由生。何以至此也。鑿五刑爲刻削。乃背道德之本。而爭於錐刀之末。斬艾百姓。殫盡太半。而忻忻然常自以爲治。是猶抱薪而救火。鑿竇而出水。夫井植生梓。而不容甕溝。植生條。而不容舟。不過三月必死。所以然者何也。皆狂生而無其本者也。河九折注於海。而流不絕者。崑崙之輪也。潦水不泄。瀆瀆極望。旬月不雨。則涸而枯。澤受瀦而無源者。譬若羿請不死之藥於西王母。恒娥竊以奔月。悵然有喪。無以續之。何則。不知不死之藥所由生也。是故

不知不死之
藥所由生其
於喪亡等也

乞○火○不○若○取○燧○寄○汲○不○若○鑿○井○

張賓王曰此篇論天人之應而終之以道德為本蓋道德刑罰乖
和相應也第不屑屑相照耳



